

No. 56. 1382. 30. Oct.

*Bürgermeister und Rath beurkunden, dass dem Pfarrer Johannes zu Taubenheim sein Begräbniss in der Frauenkirche zu Meissen zugestanden worden sei und derselbe hierauf einen am Martinsberge gelegenen Garten zum ewigen Lichte in derselben geschenkt habe.*

Wir Hannus Gebisch burgermeystir, Nickyl von der Heyde, Pecz Schroter, Henczil Alene, Hensil Kramer, Rudeger, Otte Wilansdorff, Nyckil Brun, Nyclus Reyeczan, Nycze Buckewan, Hannus Lozeman vnde Heyneman Strubin burger vnde raczlute, dy iczunt sint vnde dy gancze gemeyne der stad zcu Myßne bekennyn —, daz her Johannes pherrer zcu Tubinheim hat gekoufft eynen gartin vmme nūn schog nuwer Frybersscher grosschin, der da gelegin ist vndir sente Mertins berge von Johannis Ysinhut recht vnde redelich myt allin rechtin vnde nuczen, alze her yn gehabit hat. Nv ist egnante her Johannes von Tubinheim vor vns kommy vnde hat begert vnsers ratis, daz wir ym rytin, her hette sundirliche libe gnade vnde begerunge zcu vnsere libin vrouw kyrche, her welde den vorgnantin gartyn frommy vnde gabin gote zcu labe vnde zcu eren vnde vnsere libin vrouwin zcu dem ewigin lichte vnsers hern lichnams, also daz wir ym suldin gunnyn vnde erloubyn, wenne got obir en gebote, daz got lange wende, daz man yn sulde begrabin in vnsere libin vrouwin kyrche. Daz habin wir mergnantyn burger vnd raczlute zcu Myßne dem offtgnantyn her Johannes pherrer zcu Tubinheim vorheyssen vnde globit myt wolbedochtym mute vnde eyntrechtelichin, dy bestatunge vnde begrabunge yn vnsere libin vrouwin kyrche zcu volgin an allin introg vnde hindernisse noch der abescheidung disse werlde. Nv hat der vilgnante her Johannes von Tubinheim den egnantyn gartin gegeben myt wolbedochtym mute vnde ganczim willin myt allin rechtin vnde nuczczin, alze her yn gehabit hat zcu vnsere libin vrouwin kyrche, gote zcu labe vnde zcu eren vnde vnsere libin vrouwin, syner selen zcu troste vnde zcu selekeyt eyweelichin zcu blibin zcu dem geluchte vnde lichte vnsers hern lichnams vnde da von nicht zcu entwendin noch zcu nemen vnde den bryff zcu entwertin, wer da kyrehmeystir ist. Daz disse stücke artykil vnde wort gancz vnde vnuorrukt gehaldin werdin, daz habe wir egnantyn burger vnde raczlute zcu Myßne zcu eyner mer-sicherhey vnde orkunde vnsere stad grosse ingesigil lazzin hengin an dissin keyginwertigin bryff, der da gegeben ist noch Cristi geburt dryezenhundirt iar yn dem zewey vnde achczigistin iare an dem nestin dornstage vor allir gozheylogin tage.

Nach dem Orig. im Rathsarchiv zu Meissen. Das an einem Pergamentstreifen befestigt gewesene Siegel ist abhanden gekommen.